

四庫全書

集部

欽定四庫全書

集部

陵川集卷三十五

詳校官中書臣孫溶

主事臣呂雲棟覆勘

總校官編修臣王燕緒

校對官編修臣汪鏞

謄錄監生臣陳韶

欽定四庫全書

陵川集卷三十五

墓誌銘

遺山先生墓銘

歲丁巳秋九月四日遺山先生卒于獲鹿寓舍十日訃至經走常山三百里已馬昇歸葬燕文酹酒哭于畫像之前而已先生與家君同受業于先大父經復逮事先

元 郝經 撰

生者有年義當叙而銘之詩自三百篇以來極于李杜  
其後纖靡淫艷怪誕癖澀寢以弛弱遂失其正二百餘  
年而至蘓黃振起衰踣益為瑰奇復于李杜氏金源有  
國士務決科干祿置詩文不為其或為之則羣聚訕笑  
大以為異委墜廢絕百有餘年而先生出焉當德陵之  
末獨以詩鳴上薄風雅中規李杜粹然一出于正直配  
蘓黃氏天才清贍邃婉高古沈鬱大和力出意外巧饒  
而不見斧鑿新麗而絕去浮靡造微而神采粲發雜弄

金壁糅飾丹素奇芬異秀洞蕩魂魄看花把酒歌謠跌宕挾幽并之氣高視一世以五言雅為正出奇于長句雜言至千五百餘篇為古樂府不用古題特出新意以寫怨恩者又百餘篇用今題為樂府揄揚新聲者又數十百篇皆近古所未有也汴梁亡故老皆盡先生遂為一代宗匠以文章伯獨步幾三十年銘天下功德者盡趨其門有例有法有宗有趣又至百餘首為杜詩學東坡詩雅錦機詩文自警等集指授學者方吾道壞爛文

曜瞠昧先生獨能振而鼓之揭光于天俾學者歸仰識  
詩文之正而傳其命脈繫而不絕其有功于世又大也  
每以著作自任以金源氏有天下典章法度幾及漢唐  
國亡史興已所當為而國史實錄在順天道萬戶張公  
府乃言于張公使之聞奏願為撰述奏可方闢館為人  
所沮而止先生曰不可遂令一代之美泯而不聞乃為  
中州集百餘卷又為金源君臣言行錄往來四方采摭  
遺逸有所得輒以寸紙細字親為記錄雖甚醉不忘於

是雜錄近世事至百餘萬言捆束委積塞屋數楹名之曰野史亭書未就而卒嗚呼先生可謂忠矣先生諱好問字裕之太原定襄人系出拓拔魏故姓元氏曾大父某大父某父某妣某氏先生七歲能詩太原王湯臣稱為神童年十一從其叔父官于冀州學士路宣叔賞其俊爽教之為文年十有四其叔父為陵川令遂從先大父學先大父即與屬和或者譏其不事舉業先大父言吾正不欲渠為舉子爾區區一第不足道也遂令肆意

經傳貫穿百家六年而業成下太行渡大河為箕山琴臺等詩趙禮部見之以為少陵以來無此作也以書招之於是名震京師目為元才子登興定三年進士第不就選往來箕潁者數年而大放厥辭於是家累其什人嚼其句洋溢於里巷吟諷于道塗巍然坡谷復出也正大中辟鄧州南陽令南陽大縣兵民十餘萬帥府令兼鎮府甚有威惠以太夫人衰疾辭劇致養轉內鄉令丁艱憂終喪詔為尚書都省掾天興初入翰林知制誥金



亡不仕而卒春秋六十有八卒之某月日塋于定襄之  
先塋前配太原張氏再配臨清毛氏子男三人曰云云  
女三人長適進士程端甫次為女冠次適張某銘曰

士子賈技爭綴緝僥倖寸祿奔走急以為詩文作無益  
糞壤擲棄明月璧先生卓犖有異識振筆便入蘓黃室  
開闢大源剪荊棘大聲復完金玉擊爛漫長醉思盈溢  
瑞錦秋花亂堆積險妬護前喘肝臆羣犬號號共讒嫉  
塵埃野馬為鬼域遺山巖巖倚天壁國史興喪是吾職

義烈不負董狐筆定襄高寒拓拔國馬舁歸來反玄宅  
有書有傳俱未卒嗚呼先生端可惜嗚呼先生不可得

房山先生墓銘

先生諱伯熙字善甫漢中山靖王之後唐盧龍節度使  
侁之裔孫也自侁有幽州傳姓授節數世入契丹為王  
公數十人如劉六符等尤其貴顯者也終始契丹二百  
餘年入金源氏為燕四大族號劉韓馬趙氏其宗黨在  
仕塗者嘗數十百人先生年十六七八國學喜為詩文

卓犖有聲與雷御史希顏齊名號曰雷劉崇慶之變遂

不就舉游公卿間躋

音託

弛自肆吟諷為樂視世事若不

足為者貞祐初從乘輿入汴金亡而復歸燕往來燕趙

之間二十餘年歲丙辰復如汴卒于旅次年七十四寓

殯于蘓門丁巳春其子某改葬于燕京梨園頭劉氏先

塋房山其自號也先生資度瑰偉面若頰玉鬚髯奮張

貴氣郁郁每花朝月夕浩歌綿唱音節豪宕聲滿天地

觀者傾側以為異人出於官族而交一時鉅公故王綱

國體大禮經制無不洞練每言唐宋五季遼金以來廢興因革亶亶有條若所親見如性理象數經學文章皆能道其抵要其書法出於二王尤善真行小楷嘗謂經言篆至於李斯隸至於鍾繇真行草楷至於王羲之此書法之本也張長史顏真卿柳誠懸蘓子瞻黃魯直米元章能盡其變者也然祇當以二王為法學二王不至不失為顏柳坡谷所謂刻鵠不成猶類鶩也不本二王便學顏坡不至則遂無正筆所謂畫虎不成反類狗者

也僕初學書先大夫令臨真武樓黃庭者近千紙又令  
臨樂毅論者數百紙其大字則令臨魯公畫贊磨崖離  
堆更不許他學數年之間始令臨定武蘭亭魯公座位  
帖其草書則令臨張芝索靖二王而已今五十年矣不  
敢廢也子今嗜書其以是求之嗚呼雖無老成人尚有  
典刑學道廢缺如先生者寧可復得耶銘曰

涿郡古廟桑蓋倚幽州大墳近十里龍文虎氣尚未已  
笑傲一世還葬此突兀又見筆冢起玉骨清峻有驥子

蘭亭已臨數百紙嗚呼先生乃不死

須城縣令孟君墓銘

甲寅冬十有一月大雨雪經在杞戎人方警孟君振文  
來曰余生而孤今三十有二年矣汲汲遑遑無他樹立  
先君子又不克葬何以為人子今將由汴洛以求先君  
子遺櫬跋履山川蒙犯霜雪餓體凍膚而不顧箝口槁  
腸而不恤也遂去獲于洛之登封以歸而經亦北轅將  
會葬振文狀其事以請銘予哀其孤而嘉其志叙而銘

之君諱某字升卿世為保州人大父諱興字子昌登大  
定十九年進士第立朝莅郡嶷嶷有政績時方右文而  
公復長於吏事故遂掇臚仕終振武軍節度使父某業  
進士有聲場屋母王氏年甚富而失其天介然有守嫠  
居以終伯父某登進士第摘藻挺秀再貢天庭鸞鳳翻  
翥遂為國華終同知順天軍節度事君蚤失怙恃子於  
伯父既生鼎腴能落紛華以自振三赴廷試特賜進士  
第去不就曰大夫豈為牛後乎以任子補保州錄事攝

順天軍節度判官貞祐初北鄙用兵乘輿遷汴君為供  
具截截有紀律民不擾而備上嘉之賜一官不受曰臣  
子養君父分也何以賞為已而北兵屠保尸積數十萬  
磔首于城殆與城等君率遺民聚瘞之封十餘塚兵饑  
薦至託迹無所猶與州學生數人采稻食樵講肄不輟  
也河朔亡奔行在所授滕州司侯辟東平府元帥譏察  
徙須城令累官懷遠大將軍知國運日蹙不復中振遂  
不仕居偃師之大口志崛氣阜不忍自棄遂感疾正大



元年秋七月辛酉卒得年四十九寓殯于登封龍潭寺  
左三十二年乙卯夏四月某日葬于保之西原從先塋  
也娶李氏同郡都轉運使李公之女賢明有介操自君  
之歿撫其孤襁負寇場艱闕百至卒底于成人以為難  
能一子鐸即振文也幼孤自知為學通春秋節節山立  
雖落魄不偶而不滓世汙事業雖未見已能挺身數千  
里葬其先人以是而推識者知其必復其先矣銘曰

先澤未斬國步已蹶本既顛矣況乃枝葉埋志下泉於

金少府人二  
卷三十五  
馬可揭君材不墮君節不折氣自杳杳行自眊眊有子  
而賢自復先業搖搖新楸偃偃穉柏三尺纍然是為君  
宅文或不死萬古斯烈

許鄭總管趙侯述先碑銘

孔子曰可與立未可與權權固處之難去就死生之際  
處之尤難乾坤震蕩宗社翻覆去乎就乎骨肉離散宛  
轉決命死乎生乎惟識之明而養之素中有主而不惑  
乎其外雍容泰定不僨不撓不奪乎志不愆于義去不

苟就不屑生不偷死不傷而後權得而處之盡叔世板  
蕩罕得其人於趙侯一門見之大梁亡天命去金乘輿  
入蔡侯與其兄從時宗祧失守將夷師燬百司竄伏至  
蔡者十一二四郊皆壘孤城彈丸君臣誓死瀝血以戰  
池戰而沒則登陴陴墮而圯則柵巷柵拔而燼則負戶  
短兵頻則張空拳肉薄骨并背裂齒碎氣數盡矣於是  
君臣慟哭以自刃侯之兄謂侯曰吾荷國厚恩叨玷仕  
籍十餘年矣義不偷生以自起穢父祖俾我受學非為

祿養為忠義耳如或苟免非惟負君又負父祖汝未服  
王命有矻矻之勇足以樹立國難不可不死趙氏不可  
無後吾死國汝存趙氏後九原無憾矣言卒而戰以歿  
侯號擗突圍遂適宋宋人官之非素志也乃舉族北歸  
而仕國朝倅二州將千兵封植松楸冀除墟墓任恤宗  
族生聚子孫藹然之譽稱於當世嗚呼去就死生之義  
侯之門不既具矣乎歲己酉寓殯者皆舉而葬將碑先  
塋以賁下泉謂經曰先兄不以推魯臨終而畀以後事

受命于危亡之際竄身於兵刃之交自惟涼菲日夕汗  
戰懼不負荷今天誘其衷既卒事矣其敢自以為功乎  
先世之德也銘之可乎經拜手曰兄之忠弟之孝先世  
之德之澤其誰曰不可乃推本所自題曰述先叙而銘  
之趙以國氏本嬴姓與秦同出于伯益秦滅趙而趙散  
故為四方著姓侯之先河間之趙也世業農孝弟力田  
稱於州閭宋靖康末遼金構難曾大父元遷於冀州遂  
為冀州人大父榮有志槩爽拓不局時方右文天下靡

然向風掇膺仕綰朱紫顯岸炳耀動炙耳目顧謂其子曰閭閻皆進士嗟嗟取富貴吾子不可乎大吾門閭此其時矣遂執贄求師俾受學即侯父也諱甫字亨叔資警敏謹於禮而勤於學德既修明業日精富三與春官薦書而天嗇厥壽泰和二年卒于家春秋三十有八端序則見折于未鵞有識興嘆子璧字敏之次子輿字伯玉即侯也時大父尚康寧以未卒志為恨復命璧受學振厲穿徹年十九赴廷試聞望軒朗嶄嶄見頭角而大

父得疾援其手而語之曰來吾畀汝以志吾令爾父讀書欲大吾門閭不幸蚤卒成吾志者惟汝而已其惟勉之第不見聳壑昂霄為恨耳言終而逝享年七十有二壁感奮泣血力學泳今茹古搢挾恣肆踴躍羣倫登興定五年進士第釋褐泗州司侯累遷朝列大夫尚書省掾權尚書戶部主事方駸駸仕路而鼎命已移天興元年扈蹕入蔡二年春正月城陷死之年四十有七侯靖深有謀沈鷙老事嗜書力學重然諾耿耿有介操慮事

審而舉必得機故挺身禍亂不跌不頓卒成其志尤高  
氣節所交皆天下豪右以義相許故聲名巍甚其去蔡  
適宋也宋以為唐州司法參軍簽判隋州軍事及歸國  
朝為許鄭總管行軍千戶銘曰

孰不為死義所則死孰不為生幸偷不生死生以之義  
烈則榮趙氏一門業業言言義存君親死生兩完當地  
維之四絕六鰲友以驚奔宗沈社債蜚血渾淪莫不失  
守邈如荒廂孰如彼二昆臣節既盡先祀亦存一則奉



君以死如奔命之尚一則冒難去國如投吳之負千載  
烈烈有若而人蔡流湯湯宛彼忠魂松柏桓桓蔭其子  
孫兄不隕厥分弟不隕厥問先世不虛其教育之勤為  
人子為人弟為人臣視茲貞珉其書諸紳

崔氏世德銘

博陵崔氏由漢魏以來與范陽之盧為河朔右姓門地  
世閥更負迭庇高自擬絕當世貴官要族猶恥與聯婚  
匹然其家皆能自修飾世守禮義為朝貴為國士為士

豪嶽嶽樹立卒不靡於流俗蓋其先德先代流風遺範  
有以致然故王謝子弟雖文獻不足而猶超人羣高陽  
崔仲溫博陵之別脊也某嘗與之游其論議粹白容止  
雅亮每為敬仰想見世家風采一日狀其世德而請為  
之銘乃為俶落之崔氏世遠族大漫不可考河間與博  
陵連壤其先自博陵陟河間故為河間高陽人仲溫之  
祖某字種德淹綜經術方以經旨授鄉曲俊秀而禮部  
設經童舉君乃裂篇題銓句讀定闕例童雅甫齷

音  
櫛語

言猶啞吒即令明了功近而力捷其師法見稱於一時  
娶張氏生某字伯玉業進士有聲場屋方摘藻翦秀郁  
為國華而北鄙用兵信安軍帥檄為吏知管尋以才幹  
辟按察司議事居無何遷提舉南河漕運時京師戒嚴  
河渡梗塞往往沈舟而去君喻以禍福曲為防制糧餉  
竟達既而燕都失守河朔郡縣相繼降沒惟信安為金  
守四郊皆壘屹如面誌君與其帥誓與國斃以戰多累  
授驃騎衛上將軍遙領邢州節度副使卒年六十配溫

氏貞孝賢明母儀婦德中表宗之卒年八十一初君蚤喪其父終身不如葷肉事母尤謹及卒信安猶被圍乃偽為殯竊骸而瘞之家三年與其子某冒重圍葬先塋人以為難能某即仲溫也資純孝篤於天倫弱冠而孤信安既潰乃負母攜子裹糧闖刃隱垣墉蔽蓬葦日數十徙遇寇則戰戰已則食其母而哺其子展轉匍匐完歸鄉社掃除先人之廬養老撫幼益能托大其家萬戶張公知其綜實授規運使非所好也去之娶張氏子杲

字晉之業進士卓犖不羣嘗從余授左氏春秋一女適  
劉氏男孫一女孫一尚幼銘曰

博陵族藹世閥先澤流代不乏惟種德經作業惟伯玉  
挺完節賢父子孝奕葉惟仲溫志烈烈力幹蠱必也竭  
負厥母突寇穴忍愈堅厯百折逃威奔患難疊鬱松楸  
改顏色子復孫慶弗絕我為銘照阡陌九原光萬古揭  
程先生墓銘

惟程氏系出於重黎至伯休父為周宣王司馬見於常

武之詩程之得姓其昉於此晉主夏盟鄭為悼公乘馬御子華子著書立言稱於仲尼以趙孟殺賢大夫而去厥後晉滅鼓鼓折入于晉則晉之程先生之先也先生名良字子美世家于鼓大父滋父草廩德不仕鄉里以孝謹稱先生資稟純亮昭曠淵塞振落紛華篤於力行明昌末舉進士兩與薦書繼而有崇慶之變乃辟地于河南乘輿遷汴再赴廷試歸而嘆曰上不能匡時下不能為已可較尋常以冒進乎於是反身閉關無復世味

居激同水之上聞望日著邈以益耀從而受學者甚衆

律身既謹尚友論世與魏璠麻九疇王若虛為道義交

常稱先生以為遠之如不可得近之如不能去問學淵

深行業純備粹然一世之師儒轅固申公未足多也壬

辰河南亡逃咸于陳州州陷而卒享年六十有八娶室

同邑趙氏子男二人鎮字安卿鑄字伯祿先生嘗語之

曰鎮汝執余之鬯幹余之蠱鑄汝繼余之志述余之事

且禮罰醫藥不可忽禮以閑邪罰以厲行醫以攝生三

者修身之要安卿以先生之故學不為仕而史學淹長  
工於詩與北平王鬱唱和甚有時名亦亡於陳伯祿舉  
進士有聲場屋才幹通敏嘗為諸侯卿雖艱闕百至益  
能托大其家一女適同邑進士宋壽之男孫二曰大章  
業進士大有尚幼丙辰春改葬先塋伯祿為經言先君  
子墓宜有銘敢以累吾子經拜手曰斐文謏見不以為  
辱又何敢辭乃序而系之銘曰

北風吹塵戈矛鬪紛先生胡為乎來不為千仞之鳳而



為大野之麟以道為裳以德為紳言中乎慮行中乎倫  
不爭尋常自同于隱淪潛以益振退而益尊不矜于文  
惟德之純雖爾時而屯而以屈以伸業以傳諸人德以  
貽厥孫與化同盡亦異乎無聞淮水湯湯淪彼厚坤古  
聖今賢何皆厄陳吾欲扣帝閭而真宰或嗔壞運構凶  
玉石俱焚於乎先生有不死者存區區世塵又何足為  
先生云

廣威將軍潞州錄事毛君墓誌銘 并序

臨清毛氏在宋熙豐間成忠君瑜以力學起家一舉而三子進士第蟬聯華胄德業相望郁為鼎族自宋迄金百有餘年至廣威君而復以名節著終其令聞子孫蕃衍而毛氏益大君諱某字伯朋曾大父瑜宋成忠郎大父珣洎二弟評乙同登進士第終泗水令父大壯靖康之亂徙大名金初仕為永年簿有惠政人以佛稱君資孝謹介然有守巍巍樹立不畏義死不榮幸生每以名節自期明昌中承父任五為監差而皆以課最聞赴靈

寶簿令有故去攝縣者幾二年髮櫛苗嫗愛利決足憲  
司以廉能舉之方終更太夫人李氏訃至遂赴喪老幼  
遮道號泣展轉攀送數十里不絕禪服向闋復丁永年  
君憂大故疊復哀毀骨立言禮動禮未嘗少替大安初  
北鄙用兵選授昌平軍資庫使未幾大敵至庫所貯犒  
軍金帛億鉅萬姦人乘我師潰公為攘奪同官亦挾輕  
貨以逖從者因以為言君厲聲曰不能守官無所逃責  
又可乘君父之難為盜竊計以自利乎悖天負國禍累

子孫吾不為也貞祐初調潞州錄事待次于大名尹知其才幹檄監漕赴燕都戒嚴乘輿遷汴河朔震蕩游騎充斥道路阻絕篙工役徒蜩議曹逃君東之以法勉之以義且戰且前糧饟竟達己亥冬十有二月丙申敵攻府急尹委君計軍食而城已陷兵人脅君降君不為屈曰余家世薦食國祿無所圖報國危而死分也又可偷生耶兵人怒欲兵之君盛氣憤激義不受辱大叫觸牆立致殞絕得年五十兵退葬之府城北三里吳莊原之

先塋累官廣威將軍夫人涿郡王氏泰和名臣脩然之  
女孫封滎陽縣君與君同日遇害兵退遂祔焉子男四  
人居謹明威將軍臨淮簿居政忠顯校尉魏縣五星鎮  
酒監居仁進武校尉通許醋監既北渡以名德被徵參  
陝右宣撫司事居喜早卒二女長適宣授千戶喬惟忠  
次適順天路軍民萬戶張柔男孫三漸業進士渙澄皆  
尚幼母弟二僖字仲和定遠大將軍渭南令儀字敬之  
年未及君遲之數年竟同解而仕敬之既仕而數課殿

至於逮繫君每營援必令全釋君昆弟未嘗別籍丁壯  
六七輩軍興選募良家子敬之一子被選時征人往往  
陷沒其母行坐涕泣君憐之以已子代行人以為難能  
二女及笄鄉里名門競求姻對君不許夫人問之故君  
曰吾女若而人庸庸之徒何足辱之卒之兩婿皆開國  
勲臣鏘鳳乘龍光賁外舍壬辰河南亡毛卒在汴居仁  
白之張侯侯力出之護送北歸而為之保宥安集本支  
滋蔓日益腴茂居仁以德度直諒與縉紳先生游為時

聘君方須不次之用諸孫嶄然露頭角伯仲祚眉瞤瞤  
榮暢其增大門閥軼先德而需遺澤也必矣成忠君之  
志廣威君之義繼繼綿綿無窮已乎歲丙辰將改葬公  
夫人洎居仁請經為之誌經張侯之門下士也而與居  
仁為道義交其敢辭序而誌之銘曰

先德以為基孝友以為資細謹以自治剛宏以自持突  
兀瑰奇頓而欲施孰意其與之材而不與時金風告衰  
日入崦嵫塌翼乎卑枝而莫能奮飛于嗟乎君古人與

期國步危而氣不危鼎命移而志不移崔嵬此心死生  
以之與國俱死非死之私義烈在天子孫是貽碩大蕃  
昌其為報也宜幽墟冥冥鑱石埋辭君義不可埋諸孫  
其篤之

左副元帥祁陽賈侯神道碑銘

并序

昔李廣數奇不侯及其卒識與不識皆為流涕太史公  
謂桃李不言下自成蹊及傳大將軍青則以為有天幸  
而功烈不與蓋論人者不以成敗顧材品之何如其得



失之輕重成就之淺深特係夫用與不用而已近世河朔豪傑跨州連郡分民專土莫不自以為雄奇至論長材偉人必以祁陽賈侯為稱首聞其薨噫鳴咄咄痛惜不已蓋侯以布衣崛起而為一方之侯伯不為不偶位侯伯者四十年不為不榮但其有戡定禍亂之畧而未賜以鈇鉞有弼成至治之器而不被以公衮有處劇弭煩之智而不吏於輦轂有裕國阜民之術而不踐於會府有幹旋造化之手而不典於機密可以表則一世冠

冕當代而不羽儀於朝廷之上所以有識之士重嘆恨  
於英賢也侯諱輔字元德中山之祁人曾祖某皇祖某  
皇考某皇妣李氏侯生六歲而孤養於舅氏佟之家自  
知讀書卓犖山立沈鷺善射魁出輩行貞祐初將鄉兵  
萬以功授祁之蒲陰尉尋遷為令土豪王知以賂領州  
大為民害州人逐之推侯為守聞諸行臺遂授宣武將  
軍祁州刺史時諸方州皆事屠并爭地殺人不恤其民  
且薦饑更相啖噬侯獨保境教之耕戰招徠四方賢士

制事約法故民得安堵兵食足餘而戰有功遷鎮國上將軍遙領濬州防禦使仍知祁恒山公武仙時鎮真定而挾智事詐跳梁跋扈憚侯膽畧密令所親取侯侯挺身逸州人從之遂歸國朝詔副萬戶張公領州如故居無何仙窮蹙亦降時金源既棄河朔在所寇彼首鼠反側侯將本兵畧地所向克捷取慶都攻蠡吾還掇安平取深州近右諸縣鼓城東鹿等望風降附於是踰滹沱取冀州兵勢大振武義寧晉衡水饒陽皆下遂逼鎮定

而仙復叛去侯遂有鎮定東南諸郡萬戶張公開都元帥府于滿城侯行元帥事於初號南府初南皆隸焉已而從定山東屢立戰功遷左副元帥副張公開府于保州築壘以合南北軍兩府諸城并為一道張公將兵在外侯常居守故無巨細一決于侯乃鳩遺民寬賦租拔猾梗剔姦蠹資糧日富士馬日盛春施秋殺恩威並著默守豪帥帖沮懾服於是有城數十地方千餘里節度之州二刺史之州五勝兵數萬而戶不啻十餘萬西盡

常山之尾繞出鎮定左轉蜚狐之口東包河間出九河  
南入冀野北盡涿易橫絡上谷盧龍之塞而跨有燕趙  
恒嶽之鎮有滹沱涑易之浸有桑麻魚鹽之利棗栗  
五穀之饒金鐵織纊之產河朔諸道車轍馬足皆出其  
間四方之珍充羨而貨泉川流遂為一大都會汴梁亡  
朝省名士五十餘人會于保下侯皆厚為資給盡禮延  
待擢其英俊而加任使其耆德則事之由是四方賢士  
翕然來歸冠佩藹然有平原稷下之盛故好賢之譽日

隆事之利病日益聞政化修明人有生賴既富而教駸駸乎治平之世朝廷嘉之璽書褒贊賜以金符升州為府錫名曰順天丞相耶律公致書稱述政績之美仍以詩詠歌焉官制行宣授行軍千戶權順天河南等道軍民萬戶自是聞望益重每國家有大號令及大更革諸侯大會同必推侯為首俾應受焉侯思致周給嫻於辭令條析閭閻聳動觀聽故所言無不允諾至於籍戶之式頒之諸道子錢之蠹一本息止貸逋租薄重賦陰賜及

天下不可枚數朝廷欲使自諸侯入為卿士侯輒辭罷  
燕京道最為攘劇號稱難治且與順天境土相呀大行  
臺以詔旨命侯兼治之侯力辭不從遂聞諸朝以所佩  
金符授其子文備令襲爵為行軍千戶復授侯金符與  
之商處行臺事領順天等道如故歲甲寅諸侯會于朔  
庭上必欲相侯而侯得疾不起內醫中使問視相望冬  
十月戊戌薨于會享年六十有三上聞震悼曰朕方用  
之而奪去遽邪乃賻廢馬五俾輿歸以葬乙卯春正月

庚辰葬于祁之東原先塋夫人安氏王氏祔焉子男六  
人文備襲侯爵太兼襲祁州刺史行軍千戶文遠文進  
蚤卒文慶文亮尚幼女五人長適行軍千戶劉克剛次  
適參知政事王椅餘皆適名族男孫曰壽孫嗣侯之嫡  
子也侯資瑰瑋長八尺餘精偁老事志畧深長望之儼  
然而其中甚仁初籍戶詔驅掠者私其主侯之所有殆  
數千人語之曰普天之下皆天民也吾可奴爾而獨良  
吾乎吾若不德子孫覆亡不暇其能久有若屬乎悉籍



之為民其餘竒孤僮女數十侯一日謂其夫人曰是皆良家子彼無父母則吾其父母也可辨其族姓比其年質使各為伉儷乃為築室庀器具妝奩衣物置大會而命之且為訓戒之辭聞者皆惻然感泣及疾革又親書券并其子息與故僕御十餘家皆使為良其仁隱如此生平喜為學聚書數萬卷每令講讀必焚香北向而聽之跼蹐甚恭或勸之少安曰彼老佛者凡出一言則謂之說法令人亟拜不已今聞聖人之道敢不致敬乎尤

喜與拔後進歲時諸生即賀侯輒先拜或止之曰天下  
賤士久矣士不知自重亦久矣吾所以若是者示不敢  
以位為貴使為士者知道之在己亦當自貴也常置金  
帛於座右曰今河南新破衣冠狼狽吾必有以待遇每  
戒門吏有來謁者雖當寢食少報則必倒屣出迎厚為  
燕勞而重為資給其好賢如此晚年惟讀語孟曰是聖  
賢傳心之要典而世謂之小經吾欲使與六經並為大  
可乎又能重自克治嘗曰凡今諸侯馮藉兵亂殺戮之

餘以有今日曾作何等事業既享諸身又欲貽厥子孫  
斯民何辜使汝世肆于上乎吾叨玷仕祿五十年矣刑  
戮之間宜無過濫沒身而已敢望其後哉其存心如此  
當是之時諸鎮侯伯往往為囂吏朋民牙角嚙獮使長  
貳侵官父子奪位而兄弟相吞偏剝黎庶行賂傾軋  
至於破家赤族而不已故其兵民因以逃散困弊侯雖  
嘗蒙讒間第為隱忍至死不起訟則其惠賚州人甚厚  
幸也嗚呼侯在州里則庇護惟謹而為良將帥收斥土

宇所當穿徹則為雄方伯撫存遺黎濟之以德則為循  
良吏應變處劇創法立制則為材大夫樂賢下士為善  
不倦則為賢諸侯就義棄利不貪寵榮忠於所事致死  
不易則有古之遺直德澤在人益久益深死而不亡則  
有古之遺愛方海宇橫潰不資於人挺然自致恢宏正  
大停滙淵博非豪傑之資有大過人者能若是乎惜乎  
未盡其用而止於是也歲庚申經宣撫江淮至自武昌  
嗣後某請碑諸神游之道某應之曰向在許洛聞諸父

師曰河朔兵亂而愛民好士者有祁陽賈帥焉則知侯  
於童觀之時及其北渡館于侯門侯一見待以國士盡  
以所藏書見付使之誦讀日夕周旋聞其論議見其施  
設則知侯於問學之日侯之喪至自朔庭闔境士庶奔  
走以逆自涿易抵深冀旁午五百餘里黎老扶杖塗土  
衝雪塵壓鬢素冰淚滿面崩塌號慟若喪所親嗟隱之  
聲道路不絕比襄事凡十有五日奠祭者倚疊而哭之  
無不盡哀某為誌文環視而泣者日數十百人有所謂

罷市而往弔鬻衣以致奠巷哭以過車者則又知侯德澤之深也故叙其事而為之銘曰

三光五嶽之氣分天下無全材三綱五常之教廢天下無實德嗟嗟賢侯元化之一間世炳虛萬夫之特精金百鍊天下之利器良玉不琢天下之美質巍巍堂堂為時而出乾坤破碎元氣湮塞溟滓茫昧滑泥沫漆盜販髡黥蹠血吞食嗟嗟賢侯巍然而立應龍騰驤捧天開闢激水轉背垂雲矯翼廓清氛祲剷除荒棘連燕跨趙

大啟封域挈民囂爐置之涼寂我戰我守爾稼爾織瘡  
殘痛餘始得蘓息如焦斯濡如槁斯植髮櫛苗薈去其  
螟螣濯之以浹旬之雨膏之以三春之露動之以凱樂  
之風晞之以陽和之日尋以富教歌謠盈溢桑麻垂蔭  
山河改色不有君子其何以國曹子臧之守節孔文舉  
之好士卓侯清淨之化寇君愛利之實嗟嗟賢侯乃見  
古昔而止於斯莫不痛惜及門慟號行道隕泣大木斯  
久中生蠹賊磊落瑰岸長材偉器不害其為明堂太室

矧夫斷金之義寧肯棄於鬼蜮伊祁之南滹沱之北邱  
山巖巖豐碑抑抑大書特書萬代是式不朽惟德不在  
茲石

公夫人毛氏墓銘

順天河南等路軍民萬戶宋亳道行軍總管張公其在  
國朝樹元勲開帥閫分茅樹社傳之子孫者雖其英畧  
有以自致蓋得內外之助焉封之本根隱然啟土別作  
一道跨有燕趙則左副元帥祁陽賈侯輔先後禦侮為



虎傅翼夾之以飛則行元帥涿郡喬侯惟忠智謀勇力  
腹心爪牙戰功獨多則易州軍民總管何侯伯祥霽威  
為和撫摩將校使盡死力此為內主則公夫人毛氏也  
賈侯三人者皆先公卒經皆文其碑經自弱冠館于公  
門教授諸子者七年故受公夫人禮遇茂厚知其內行  
為悉歲庚申經宣撫江淮至自武昌則公夫人已薨矣  
乃為文奠哭而其子某等致辭請銘經何敢辭按毛氏  
周毛伯之肩北京臨清人宋熙豐間成忠君瑜以力學

起家一舉而三子進士第以迄于金遂為鼎族公夫人  
泗水令珣之曾永平簿大壯之孫廣威將軍潞州錄事  
伯朋之女大興尹明昌名臣涿郡王脩然之甥也既出  
腴閥華胄而其少艾郁有貴氣與其姊皆及笄鄉里名  
門競求姻對廣威府君皆不許曰吾二女若而人必配  
豪傑靡靡庸壻何足辱之及北京陷張公納以為夫人  
而其姊則配喬侯焉公夫人資婉淑明徹沈郁有策畧  
時門下將校百餘人多與公故等夷或刮金飲血之友

或布衣刎頸之交或擒獲屈膝虜勇之士或反覆變詐  
姦宄之人皆方資之以為用而公以蓋世之氣事多濶  
畧且日鏖戰不暇存撫公夫人則勞來燠休之每詰旦  
以醇酒數石置大銀甕中設金銀斗盃不置盃杓褰簾  
徹幕撾鼓鳴笛命各劇飲置大戟不置挾恣其嚙啖嘗  
製錦紵絺繡美衣而時以公意賜之其戰而被傷者則  
親飲之藥而為良劑傳之又各與膏腴田宅而時以珍  
玩慰結其妻子故無不感悅盡力公常出征軍中府中

雖賈侯總統而於機要必取決焉經營比次嘗出資糧馬仗以給公故公無內顧之憂而攻必獲戰必勝己亥

以下闕文依明季本刊惜無善本  
補正姑闕疑仍舊以俟博識者

己出教之書而勉以義故皆有成資喜為學陰陽圖傳藥石之術老佛之書詩文之藝皆能究竟日讀佛書為課焚香靜坐澹然若與世遺者初自己亥歲歸公己未八月某日以疾薨于寢享年六十有二是月某日權厝于府城東原一子某蚤卒二女長適喬侯之子琚幽閒

執禮有母氏之風賦詩彈琴窈窕物外人元內翰以其  
姨女嘗與之號曰靜華君次適易州太守郭某竊惟婦  
德以順為正而不在於才故易曰坤道其順乎承天而  
時行又曰在中饋無攸遂詩曰無非無儀惟酒食是議  
無父母遺罹則不可有為其垂戒如此而春秋謂宋共  
姬女而不婦易復謂其動也剛古今載籍殉夫訓子烈  
然有為凡著名節者皆著于篇則與其有為以垂訓又  
如此蓋以順為正不可有為者常也開國承家贊內叶

外紛拂而不失其操顛沛而不改其度卒能成大事業  
有為而靜專在焉則變也故正者德之本變者德之用  
二者兼備公夫人有焉銘曰

高門夏屋兮婉婉周姬玉虹蟬聯兮光生門楣乘龍崛  
起兮邦家之基宜爾室兮公之資室有閑兮孰敢嘻子  
孫奕葉兮而乃棄而碧梧凋兮鳳于飛春風花落兮百  
鳥悲素琴生塵兮褰總帷老虎飲泣兮霜滿眉百城縞  
素兮失壺儀長紼十里兮攀靈輶聲徹天兮淚成池其

德在人兮茲其可知中堂蕭條兮門慘淒覆玉盃兮反  
金卮將士揮涕兮撫我其誰賓客掩袂兮吾將安歸松  
搖搖兮柳依依魂一斷兮雞水湄西園月照兮西堂西  
星為冠兮霞為衣玉女兩兩兮纏霜霓天外珮響兮鳴  
珠璣香霧冉冉兮煙霏霏貞魂之來兮其惟此時

故易州等處軍民總管何侯神道碑銘

有序

朔龍起陸真人時乘破蟄窟奮氷天而蜚其翻瀚海之  
波濤震雪山之雷霆瑰厲日月推蕩風雲布為時雨轉

為陽春發育萬物作新生人雖曰聖神受命運會所屬  
俾之立極垂統亦一時豪傑相與比攸基構鳩緝樹立  
有以孱就者於燕趙之交崛起雄鷺羽翼元臣開拓土  
宇共成天功智計則策士勇力則名將慷慨服義忠於  
所事千戶何侯有焉公諱伯祥字世麟易州涑水季路  
里人曾大父泉大父國清世厚于德為鄉里望族父淵  
材武善射智畧沈勇貞祐初起家為義軍都統守清楊  
口戍紫荊關阨上谷諸道濟流民還生口遏寇衝威惠



並著終于易州刺史母鄧氏州里名門以聖善稱侯資  
夙成自童丱從其父勇不自制數嘗敵鋒輒執俘折馘  
衆皆異之年十五事中都經畧使苗道潤初道潤與其  
副賈瑀有隙一日從數騎出瑀伏甲射之顛于道左從  
者駭散侯獨下掖之道潤慙絕不能乘伏發前突侯奮  
槍大呼殺數人賊乃遯去遂取道潤所佩金虎符以出  
令疾足間道聞諸朝乃命易水公靖安民代道潤因事  
之初侯之父嘗為山西賊所襲乃言諸靖侯與十二人

俱冒險捷出以復父仇殺掠數百里破靈丘奉聖安水諸堡寨時年十有六衆以何郎目之是歲靖公薨侯以符節歸令萬戶張公推堅陷銳勇嘗冠軍張公愛其材常置左右使之先後禦侮每戰輒與之俱侯亦以死力自效迅厲穿徹所當無前時河朔既定惟保定王子昌與信安張甫犄角為金守阻水出沒劫掠近右子昌貌寢善戰軍中號為墓裏鬼為金經畧使尤為驍跋萬戶張公一日命侯取之侯厲水徑渡薄其城遂門焉格鬪

以入旋戰而出子昌窘甚攜其妾以遯侯追及之子昌  
背左以射中侯貫手于槍乃拔矢舍槍縱所乘騎張空  
拳而搏之生獲子昌及所佩金虎符偏裨數人束手就  
命信安尋亦潰南出奔河朔遂平西山諸砦餘寇所保  
如軍市川姑姑塢紅花谷閃堂白虹野狸郎山等尤險  
絕皆攻下之於是關地千餘里取三十餘城南直淳沱  
背盪幽陵西塞蜚狐之口東跳瀛博鷹揚虎踞隱然一  
軍跨有燕趙歲壬辰從萬戶張公攻汴京拔洛陽圍歸

德破蔡滅金第功嘗第一歲甲午宋人畔盟大舉伐宋  
從萬戶張公破漢東諸城屯曹武鎮侯將一軍於安陸  
郢復沿江上下破三十餘湖得船數萬艘又破芭蕉望  
鄉大洪諸寨馘虜萬計宋人出荆鄂選兵二萬救洪山  
公逆戰破之獲統制路分等一十六人軍資器械不勝  
計瞰臨江口有長驅之勢威震荆楚從攻光州帥拔都  
軍二百先登破其外城遂急攻并其子城拔之會攻黃  
州適有小舟來覘者萬戶張公曰是舟泛泛伺吾隙耳

必暮夜來攻不備必為所乘命侯伏甲赤壁下以待夜  
二鼓果水陸俱出侯令其徒按槍箕踞俟其過中衝而  
橫擊之宋師大敗溺水者不勝計師還又拔張家砦俘  
獲數萬大帥口溫不花察罕等既厚賞拔且以其功聞  
諸朝歲戊戌張公入覲陛奏曰臣之佐何某屢立戰功  
宜加旌異乃賜宣命金符充易州等處行軍千戶兼軍  
民總管仍賜殿馬錦衣金甲自是萬戶張公常命侯將  
行營攝帥府事軍中府中事無大小一取決焉侯既佩

恩遇知無不言有所不合必犯顏以爭萬戶張公之樹  
元勲開帥閩兼統河南諸道鎮遏江淮侯之力為多歲  
壬子將行營會諸軍南伐既入敵境而大帥以故自他  
道遽還諸軍不之知也錯迂倉皇莫知所適至于江口  
侯曰由所來而歸必為敵所遏不若出其不意深入巢  
窟彼不我測乃可出也遂突戰旁出直抵司空寨寨宋  
重兵所宿衆十餘萬逼寨而壁疏布營壘凌高伐木為  
合圍攻取勢既夜命人為五竈火十炬選精銳設伏于

營之前後先據險要黎明令軍士盡行而後鼓敵下衆  
來追伏發敵駭亂且疑其衆盛遂奔追擊大破之摩壘  
而還轉鬪千餘里他軍不能歸者并護以出上聞之下  
詔褒異賜白金五百兩歲己未方以疾歸第令上南伐  
詔侯參與帳前軍國事奇謀秘計多所獻納秋九月王  
師渡江冬十月二日侯故疾復作壬寅終于鄂州江上  
之潯黃洲春秋五十有七夫人郭氏萬戶張公之甥也  
婉淑有禮中表推其賢子男二人長瑛襲行軍千戶先

後卒次瑋卓犖有父風孫德隆襲行軍千戶二女長適鎮撫王林之子某次尚幼庚申春正月葬公于易州馬頭砦麓之貯梁原既卒事其夫人及其孤與其將佐任某等狀侯行請文諸神游之道某嘗館于萬戶張公之門與侯游而莫逆故知侯為詳侯偉風儀善辭令膽力拳勇輩行罕儔沈鷺有幾衡每戰輒先人而奪之心御下嚴厲束之不少縱雖其同僚至出令臨陣必以聲色威之渠亦懼服故攻必克而戰必勝疾惡尤甚面數其



姦而不斲通書傳大旨樂與士夫游謙抑蘊藉不知其  
為武人渡江之後與某會于武昌醞酒臨江跌宕懷古  
論當世事從橫無窮國家方將奄甸江淮混一區夏而  
奪去之遽可哀也已既叙其事又繫之銘以寓哀文或  
不死樹不朽云辭曰

大恒東馳直入海涯海山沈雄故其人似之趙韓王之  
智曹武惠之賢照耀有宋亦如唐之山西歌謠慷慨借  
交報仇流風至今豈惟昔時烈烈何侯乃今見之將門

出將而又過之童穉虎舉露食牛之氣終乘龍運有良將之規目無全敵而能全師攻無堅對而能堅持握兵之符發兵之機如脫兔與處女每紛紛而出奇晚節方隆遽與世辭風蕭蕭兮易水湄壯士一去兮不復歸昔人送荆卿吾以為侯悲

故中書令江淮京湖南北等路宣撫大使楊公  
神道碑銘

皇朝誕膺天命奄征區夏經武海外既一再傳始究內

治用楊公為相與天下休息公乃恢張規模維繫綱紀  
誅鉏兇渠愛養黎獻整領衣冠收藏典籍斯民得以迓  
續遺命吾道賴以不亡天下復見中國之治繫公之力  
焉公諱惟中字彥誠洪州人曾祖某皇祖某皇考某皆  
用武貴金末公以孤童子事太宗自知讀書有膽畧太  
宗器之弱冠銜命使西域三十餘國宣暢威靈敷布條  
要俾皆籍戶屬吏數年而歸乃有大用意廓出太子伐  
宋命公於軍前行中書省克宋棗陽光化等軍光隋郢

復等州及襄陽德安府得名士數十人收集伊洛諸書  
載送燕都立周子廟建太極書院俾師儒趙復等講授  
公遂知性理學慨然欲以道濟天下耶律楚材罷遂以  
公為中書令領省事太宗崩太后稱制公以一相負任  
天下谷幽皇帝即位平陽道斷事官斜徹橫恣不法詔  
公宣慰公按誅之出一府繩擗莫不健其決金亡恒山  
公武仙潰于鄧州其餘黨散入太原真定間據大明川  
用金國開興年號衆至數萬出沒劫掠數千里詔會諸

道兵討之不克公仗節開諭降其渠帥其黨悉平憲宗  
皇帝即位今上以太弟鎮金蓮川開府承制封拜奏公  
為河南道經畧使初減金以監河橋萬戶劉福為河南  
道總管盡有金源故地福貪鄙殘酷害虐遺民二十餘  
年公至召福聽約束福畏公稱疾不至公命設大挺於  
坐復召之使謂福曰爾不奉詔者吾以軍法行事福以  
數千人執挺擁衛下車見公公即握大挺擊踣之方起  
又連擊之福匍匐禿魄而去數日福死百姓鼓舞稱快

河南大治遷陝右四川宣撫大使以諸軍帥橫侈病民  
郭千戶者尤甚殺人之夫而奪其妻其子告公馘之以  
徇關中肅然公語人曰吾非好殺國家綱紀不立致此  
輩虐良民無所控告不去不仁何以為仁乎歲己未  
今上總統東師奏公為江淮京湖南北等路宣撫大使  
俾建行臺以先啟行宣布恩信蒙古漢軍諸帥並聽節  
制師還冬十有二月某日薨于蔡州春秋五十有五公  
相三君厯事四朝出入柄用者三十年天下畏其勇而

懷其仁夫人某氏一子某方為諸生受學以經公之同僚上介請文其事經曰昔王儉碑褚淵張說碑姚崇同僚故也矧公之德於斯民有功於中國甚厚幸哉可無書乎序而銘之銘曰

赤氣竟天北屬斗尾殺伐用張貞人是啟太祖取之太宗治之帳前異人去殺有時崑崙虞泉仗節而往飲馬河源指揮酋長滔滔江漢伊洛淵源北面降敵遂傳中原試可不違爰立作相始用漢人斯民有望化樞載轉

雷雨一新日出水天萬象皆春乃宏三綱乃舉八柄噓  
枯為生活我遺命天資嫉惡誅去三兇精金百鍊莫當  
其鋒斯文不喪衣冠是賴又一太極天地不壞伊予何  
人一旦佐公布宣王靈附鳳攀龍振旅凱入際會千載  
年未中壽遽止于此德能及人施必在子刻詩貞珉以  
召信史於千萬年公乃不死

河陽遯士荀君墓銘

有序

中統元年持節使宋館儀貞者二年河陽荀宗道以門



生從行為行府都事治書狀都管二事繼繼淹抑日夕  
相從一日書其先人之事以請曰不孝曹昧不能備述  
先德惟是先人之事所見聞者敢請一言半辭以貢冢  
木余之先君子晚年與宗道之父游處里閑相得而甚  
相洽也以余父之執且其子受學於余故嘗聞其論議  
而見其梗概於治亂情偽靡不洞練而論皆膈臆蓋知  
幾之士不犯難行而能遜世以保身者嗚呼乾坤龍戰  
海宇橫潰能為時而起樹勲名開治泰以濟斯人則可

也如其不能卷懷閉密不與時角以全其天亦可也不然則冒難以進而不知止鮮不為暴虎馮河徒靡身於世者君諱士忠字信之孟州河陽人金源末以貨食豪鄉土知世將亂乃挾游京都結納豪右以觀時變及歸而河朔已受兵矣州募民團守號義兵推君為都統保青龍山時金遷汴限河以國流民南渡為北兵所擠而阨于河孟津渡尤為要塞而津吏因緣為姦名為守法而控勒納賄積流民數十萬蹈藉以死君謂其人曰是

不可坐視於是列津吏罪狀請於機察使而聞諸朝即  
詔不拘常例命曰海放流民濟以全活歲壬辰河南亡  
君知不可為乃散所保各歸鄉里兵鋒方南遂北首以  
辟之居燕趙之間宣使老索來蒞順天知其材欲引為  
參佐力辭不就無何告訐蝟興更相誣陷往往破家惟  
君獲免益稱疾不出二十餘年不視戶外以絕辟召或  
者又欲相授遂稱疾篤舁歸河陽先世之未葬者皆為  
遷祔其諸子昏配亦畢乃曰養生喪死餘無憾矣汝曹

有業足以樹立有田足以衣食我亦瞑於地下戊午春  
二月己亥卒于河陽之沈河春秋五十有九從葬先塋  
禮也同室劉氏雲中大姓也敬順不違克盡婦道二子  
宗道宗禮宗道沈郁力學已為偉器宗禮材勉克家識  
者皆謂能大其後矣作詩以告諸幽云

昔曾拔劍倚太行種花醺酒家河陽濡如裘馬年少場  
南入鞏洛東汴梁任俠尚氣脩髯張四方有志歌慨慷  
大河誰意忽褐裳沈濟一夜水滿箱沸鼎不敢還探湯

長材逸器都卷藏  
九牛欲挽從爾強  
欲我妄動君荒唐  
落日倒景明榆桑  
桑梓奕奕生輝光  
始終全歸計亦良  
有子有祿君不亡

陵川集卷三十五

欽定四庫全書

陵川集卷三十六

元 郝經 撰

墓誌銘

先曾叔大父東軒老人墓銘

金有天下百餘年澤潞號為多士蓋其形勢表裏山河而土風敦質氣稟渾厚厯五季而屢基王業而嘗雄視天下故其為學廣壯高厚質而不華敦本業務實學重

內輕外宋儒程顥嘗令晉城以經旨授諸士子故澤州之晉城陵川高平往往以經學名家雖事科舉而六經傳注皆能成誦耕夫販婦亦恥謠詠而道文理遂與齊魯共為禮義之俗而加厚焉陵川學者以郝氏為稱首郝氏之學浚源起本而托大之者自東軒君始君諱震字子陽系出有殷帝乙封支子太原郝鄉因以為氏始祖儀自太原遷潞州高祖祚又遷澤州陵川曾祖善祖從義父璋七子君其季也君資茂異自知讀書不為章



句謏學宦學入京師太學游公卿間久之乃還蓋厭棄  
凡近不屑就之也既歸徜徉山谷從而學者甚衆講廟  
道藝淵滙日遽益有高世意而無復世味以經旨授學  
者折之以天理人情而不專於傳注尤長於理學賦詩  
多警句晚年益趨平實淡如也彈琴得古遺音每呻吟  
俯仰趨節紆韻超然若有所得逢山水佳處輒為數日  
留賦詩彈琴自樂也一日過一道院松竹茂蔽坐於其  
下彈琴而歌睡鶴十餘驚起鳴舞珊珊夏夏終曲乃去

從者咸以為異事諸兄甚謹篤于友愛諸兄以族大稱  
長兄之命異居君乃涕泣三日不食曰吾業儒而為是  
何以為訓不義而生不如死諸兄得欲而生我將服義  
而死諸兄懼復聚廬同食以終年四十九配侍某氏子  
男三人天祐天祺天貞皆治經為學而天祐尤知名君  
初名旦後更今名自號東軒老人銘曰

太行義戕天地之脊吾家其顛千載寥閔箝以益固噤  
以益默惟君亢亢矯首迅出揮斥鴻荒面目太極寥立

圃之玉芝剝荒除之天棘秋蘭兮青青秋香兮滿庭君  
翩翩兮下征掇其實而餐其英乃曳長裾乃抱玉琴明  
月清風翛然此心葱葱兮桂陰慕其德音人累益輕天  
趣益深夫復何為付之長吟君其往矣後來繼今

先伯大父墓銘

郝氏世業儒以治經力行為本而篤於齊家之道自曾  
伯祖以嫡長泣家已有法制使子孫世守至伯大父復  
以嫡長泣家而昆季十餘族長祔百餘口既總家事乃

會諸宗戚而告之曰夫衣食足而知廉恥倉廩實而知禮節士所以忘義失守至於沮氣墮節者殆多逼於饑凍耳故孟子以農桑為王政之本而其書數及之今某以次為家督欲諸宗親子弟治生為學二者兼進始則仰事俯畜終焉立身行道進而得則各大而家退而失則必有所歸不至於落魄無賴亦足以為善士夫少有大志不事家人生產雖或成就有過人者而為書傳所稱亦非教育之良法泛駕破車雖一日千里曷若馴服

以進於道乃相其宗親子弟材器曰畀汝田若干頃畝  
汝率田夫而治之桑若干本汝率諸婦而治之錢若干  
緡汝率商人而治之書若干帙汝從某師友某人而治  
之余則均其有無而治其勤惰於是數年之後貨食豐  
餘而學業日進先祖及諸父文譽大振而門下學者日  
盛矣其在家也則雞鳴而冠衣杖而立於庭諸房子弟  
婦姒皆闔門秉燭盥漱笄總黎明以次省於舅姑父兄  
退而各執所業或少有稽緩則旦而問之故責之庭少

廢禮者則加鞭扶焉至于再則會宗親中表列其狀而加之罰飲酒醉者有罰冠衣不正者有罰取友不端者有罰事師不謹者有罰惰于學者有罰相慕問者有罰譁于庭者有罰中堂曰棣華歲時燕集上下肅然又以孝友睦婣任恤等數條書于榜曰有違此者非郝氏子孫至於鄉隣不法者畏其聞知輒自戢曰勿令大翁知有訟者則相率而質其曲直行於里巷望者趨而避不及則揖而拱以待其為人敬畏如此縣令丞每至縣則

輒就門禮謁其諸弟姪必一人教授縣學故門第家法  
無不推重君諱源字清卿曾大父曷之長子也卒年六  
十四伯祖母王氏二子輿輦輿字正之博學能文三赴  
廷試有聲場屋歲壬辰沒于兵士林惜之銘曰

郝宗重承兩世嫡方玉千仞斷鼇立之綱之紀撫其室  
支本蔓衍蕃宗戚李廣簡易誠無敵刁斗未若程不識  
有身有家衣且食晝吟夜誦簡與筆原田每每日壑闢  
繭絲爛爛充以殖孝弟忠信修行實言笑顧步皆紀律

家道既正無敢逸富貴在天吾豈必凜焉高風誰可及  
雲白天青太行脊擬將傳聞作家極再拜揮涕書貞石  
子孫世守其勿失

先大父墓銘

歲丙辰春經至自沙沱家君得風痺疾遂在牀簣卧以  
畀命曰吾齒已過吾父十年矣雖疾病夫何憾惟吾父  
之事先有子元子之表在而壙中之文未具且大節之  
灼灼者而猶未既載焉吾語汝汝其論次乃再拜受命



叙其事而為之銘惟郝氏繫出有殷世于太原一再遷于澤之陵川遂為陵川人高曾而下皆學不為仕先大父諱天挺字晉卿幼開朗卓卓不羣舉進士兩赴廷試以太學生顏翥縉紳間崇慶之變束載而去曰時事如此可區區冒進乎遂歸遠近俊茂多從之學其教人以治經行已為本涖官治人次之決科詩文則末也故經其指授者往往有成資河東元好問從之最久而得其傳卒為文章伯震耀一世其餘鉅公碩士出其門者甚

衆則其所學可知已時有金既棄燕雲河朔隨亦不守  
遂往來淇衛間貞祐初人爭南渡而阬于河河陽三城  
至于淮泗上下千餘里積流民數百萬饑疫薦至死者  
十七八先大父曰坐視天民之斃仁者不為乃貽書機  
察使范元直使聞諸朝曰昔昭烈當陽之役既窘甚猶  
徐其行以俟荆襄遺民曰成大事者必資於衆人歸而  
棄之不祥君子謂漢統四百年此一言可以續之今國  
家比之昭烈不至於窘河朔之民獨非國家赤子乎夫

人心之去就即天命之絕續也乞詔沿河諸津聚公私船寬其限約晝夜放渡以渡人多寡第其功過以救遺民結人心固天命中興之期庶幾可望書奏即日中使告諭令疾速放渡河朔之民全活者衆於是亦挈家南渡興定元年冬十一月八日遺疾考終命于北舞寓舍春秋五十有七臨終浩歌一不及他先祖妣張氏前卒繼祖妣司馬氏一子即家君也男孫三經彞庸女孫一歸清苑陳氏初既遺疾謂家君曰郝氏儒業自吾叔父

東軒老人始我死葬其墓側庶得奉杖屨于地下既祥家君將歸葬諸父兄以河朔兵亂不許家君乃夜啟殯負其櫬以遯而英靈屢見于其所往輒為警覺以導其行雖徒步千里渡大河登太行展轉寇穴卒達于陵川興定四年春二月二十四日葬于先塋東軒老人之墓側從其志也先大父美風儀冠衣甚偉閑於辭令脩然物外人而談王道議國政商處吏事甚得體要巍然公輔之器而適叔世東背塵閑竟莫能用卒於流寓人憐

其志云銘曰

郝世不競其株根赤立擎霜蘊華于春一世于邁天  
葩吐芬晦以奕世其氣益振氤氲渾淪其屈益信萃于  
我祖淪蘭天津邁其羽翰疑于青雲巖巖盤盤穹乾厚  
坤玉山高寒瑩徹無塵雖事業不少見而道義是存繼  
其志有千里負葬之子述其事有萬古遺山之文滄海  
遺珠長鯨怒吞匱輝翳光以耀其諸孫嗟余諸孫可汨  
其流而湮其源志惟益堅氣惟益完以復九原以慰乎

下泉

先叔祖墓銘

先叔祖諱天祐字賢卿先曾叔大父東軒老人之子先  
大父之從昆弟也宇貌瑰托器識高邁日記數千百言  
而下筆不能自休初為學即不作決科文務窮性理經  
術而汎入佛老者數年以為過高無畔岸復取六經語  
孟讀之於是際天人之學瑩如也大安末知世有復隍  
之變愈益遜默貞祐初南渡隱居魯山往來箕穎超然

欲以追巢許也作古文歌詩往往散落世間故雖隱而  
名愈顯尤玩意書法嘗以為正書當以篆隸意為本而  
鍾王書之經也顏坡書之傳也其餘則諸子百家耳故  
其筆勢莊重秀勁能作文餘楷草嘗言大字雖大而小  
字雖小而大正書須有草意草書須有正筆其論書  
如此趙內翰周臣見君蘓墳詩及書蹟遂遺書欲致之  
京師即挈家去於山林幽阻人迹不及者而居然無幾  
何雖京都人亦知其處後聞有欲薦諸朝者曰大厦將

傾吾不能為破家人又挈家去元內翰裕之既受學于  
先大父又嘗與君周旋文場故特敬畏聞其又遯去乃  
以詩相招君復詩絕之而竟不出壬辰之變年四十九  
沒于兵先叔祖母宋氏一子思直字繼先亦博學能文  
亦皆歿于兵嗚呼郝氏之學大于東軒老而終于君其  
嗣胤遂不復見而諸父昆季亦皆泯泯焉獨遺家君及  
經天乎何於吾郝氏若是之刻也先君既命經論次先  
世故書此以列諸東軒老人墓側以示不朽銘曰



文葉班班賁于衆枝道氣顛實于君匱竒初則亡羊幾  
惑多歧瑰詭譎怪投瀾抵蹙番然而回真是之歸明白  
開朗冲融希夷弄月吟風獨樂良知德充乎身命違于  
時收藏天光滑于塵泥每登琴臺望元紫芝千山雲沉  
知音者誰濯足于潁振纓于箕庖不治厨何與祝尸棟  
折榱崩夫誰可楮我其長往山鹿野麋君無我招亦莫  
我追我非絕世不可有為大河絕流商於雪飛天狗墮  
地蚩尤出旗嗟嗟乎君既往莫違獨不慙遺諸孫孔悲

伐石鑿辭東軒之西魂其一來與不死期

子阿寶附殯誌

歲壬寅余始醮于滿城徐氏甲辰春正月子阿寶生廣  
穎方頤眉目若畫氣阜而聲宏家君以為類先大父日  
夕抱弄甚以為慰丙午春先妣委化權厝于府南侯河  
之北原術者默言君家喪氛未殄余在衰絰重以為憂  
夏五月三日童稚聚嬉以冰屑置于阿寶之腹觀其溶  
滴以咤其駭頃之寒氣入腹暴下數升入夜背弓搐搦

而氣竭生三年矣明日附殯于先妣墓之西側哭而納  
銘于壙云

屬余毛離余裏狀乃爾嫡有子而遽死兮吾母之土未  
乾而復窆于此兮祇重余之戚豈余之子兮

子阿長附殯誌

歲戊午冬先君告終權厝于府西吳爺灣之北原庚申  
春余宣撫江淮至自武昌哭墓而入墓之東足小丘附  
焉不知其為誰也銜涕而去及門冢婦哭于室乳媪之

懷空矣乃知向之邱吾子之所也因慟幾絕既而嘆曰  
天乎何天虐吾郝氏之酷也母氏之終再踰月而吾子  
阿寶卒附殯于墓側吾父之終亦再踰月而阿長復附  
焉豈母氏之愛阿寶而攜持之去耶吾父之愛阿長而  
抱弄之不忍舍耶故各于其終之後而卒卒而附于其  
墓抑吾之不德不孝致吾子之弗克昌耶祇吾之不德  
而禍吾子耳可無殤乎乃叙而誌之初徐氏不婦歸于  
家再娶淇澳張氏是生此子五年而卒生于乙卯春三

月五日卒于己未春三月十二日尤慧而秀發言如成人以癰疹疾殆將卒謂其母言我死則已奈我母憂何或問其父則閉目擺手曰我不得見矣聞者皆為泣下  
銘曰

不子其父孫于其祖各附于墓共為寃土欲問無所于  
嗟天兮

行狀

先父行狀

郝氏本貫澤州陵川縣曾祖章祖昇父天挺先父諱思  
溫字和之資剛潔迴迴不倚不為遽篠戚施疾故與世  
不偶然而人亦不敢以非義屈橫逆加儀幹不及中材  
而凜凜莫敢犯以亮直自處不億不信中心充實無所  
虧欠初成童與河東元好問從先大父學俶落六年洞  
達遠滙其所得者有所自其所作者有所徵天端理倪  
首尾貫究晦而蓄之靳靳不妄發年二十許奉先大父  
下太行往來淇衛間時河朔已受兵有金疆理日感慨

然有志於功名居無何得腰股疾志鬱抑不信遂不就  
舉貞祐初南渡館而師之者甚衆誠法理意籍籍馳播  
所至席不煖先大父卒于舞陽既免音問喪謂諸父兄曰  
先君子卒於流寓不克歸葬安用子為子而委父何面  
目天下諸父兄以河朔兵亂不許乃與先妣夜啟殯而  
負之去渡河至長垣資用皆為盜殺從行者因是亦散  
去獨與先妣扶杖負骸步登太行中路賊二人呵止之  
曰背負與我不然則死乃啟之賊愕異問故曰是先君

之靈將歸葬鄉里賊慘然曰擾擾如此而欲辦是是癡子不足道置火餅數枚而去遂葬先大父於陵川之先塋興定四年也元光元年復渡河河南亡攜經北渡居于保聚俊秀而教之者十餘年經年十有六命治六經先傳注疏釋而後唐宋諸儒論議必一經通然後易業焉壬子館于萬戶張公府教授諸子丙辰經被徵北上及還議歸鄉里拜謁松楸夏四月十有七日得風疾不起在牀簀者三年戊午冬十有一月二十六日增劇二



十七日夜忽命經等曰天地之道恒久而不已人惟恒  
久乃有前程天下事何嘗不因不恒壞了整衣冠強為  
之起吐惜曰發志氣遂瞑不復語二十八日終於寢年  
六十有八門生苟宗道趙泰尚文等相與謀曰先生不  
苟祿仕困而不撓臨終而猶以志氣為言不亦卓乎可  
謚曰靜直其未嘗祿仕可稱處士十有二月一日與先  
妣神宮同權厝于保城之西吳爺灣之北原三男經彛  
庸一女適清苑陳容男孫二女孫二皆幼先父生平喜

為歌詩徜徉跌宕以自樂而多散逸得遺藁一百二十篇晚年尤邃性理學手書西銘畀經曰是入德之幾造道之階也教人以小學為本以為灑掃應對進退即性與天道之端致身行道樹立事業性與天道之功用充實而大大而能化性與天道之成終者人之始生其醇未醺其樸未散其見解未出其物欲未雜先入者而為主終身由之而不能去古之人至於胎教况髫髻之間乎語言啞咤肝臆絨固神出入而未舍識露昧而未

明容妥娜而未莊氣閃爍而未定謹其所習政在於是  
乃為言坐行立揖拜俯仰之節誦記熟復執筆為書之  
制聲音笑貌䟽數疾徐之儀一之以敬而不使之惰少  
長則為解說義理綴緝章句簡直切律力少而功倍之  
成童則以性理經學為本決科詩文為末而寢致之大  
學嘗語人曰人見吾之規規子子必以為是區區致力  
於小者而小之也吾不病也夫事有小大理無小大也  
本末先後吾不敢躐而欺之也彼所見者以為小吾所

見者以為大是吾所以積德而遺吾子孫者世之人好  
高慕遠以欺世盜名未能灑掃應對而便說性與天道  
索理踰分枉探速成戕本根壞倫類示不以常而重為  
之誑敗德孰甚焉吾不為也孟子曰大人者不失其赤  
子之心赤子之心良心也其為大人保是心而已棄赤  
子之心即為大人可乎哉歐陽子謂顏狀未離於嬰孩  
高談已及於性命者殆亦為是耶其設心如此故所到  
輒見稱學者往往終為成人方卧疾也一日語經曰汝

祖父有言士不能忍窮一事不能立汝曹毋以淺功近利有速售之心也慕利則敗義欲速則不達汝能勤則功自至汝能儉則利自來故立身行已在夫堅忍而已能堅忍則能忍事歷大患難處大富貴決若長河而不回屹若泰山而不移然後可謂大丈夫凡為亂畧姦宄不終其身者皆不能忍耳染指垂涎之氣不除負鼎滔天之心常在一旦肆欲憤不顧義殞身喪元而及其宗盜侈一時遺臭千載汝曹可戒也過庭之訓類如此鳴

呼先父身無一命之爵史無一字之書其於改葬先塋  
擴無一辭之文是大泯泯也立言君子苟為稱述銘佩  
之意死且不朽孤子經等謹狀

先妣行狀

先妣姓許氏澤州陵川人與郝氏同里閨世為姻好故  
既笄而適家君逮事先大父甫廟見北鄙已用兵遂從  
家君奉先大父逃威山谷間推夷就險羞精食疏采薇  
蕨汲竅澗樵薪蒸以養備極艱苦而不憚也興定元年

先大父卒既禪家君曰養生不足以當大事惟送死可  
以當大事父死而不克葬安用子為遂與先妣決策歸  
葬諸父兄以河朔兵亂不許乃夜啟殯竊骸以遁時金  
國棄河朔限河為守諸津要皆禁自北而南者則渡有  
王事于北者則渡非是則不渡也久於河上資糧懸罄  
適有受業先大父者為機察使俾偕賜上黨公茶果船  
以濟遂至于衛之長垣賊衆單重等行剽掩至人皆入  
窟室先妣獨不去守骸以坐曰寧死可棄我翁之靈而

求生乎賊至將兵之不為一動賊厲聲曰若何人獨此  
不去若所守者是何寶貨曰此我翁之靈將歸葬先塋  
者今幸得濟河有死而已其可去乎賊感愴允鋒少沮  
詰姓居曰陵川許氏也昔舅氏彪嘗為澤掾賊中有澤  
逮而得舅氏保宥者因驚悟曰若許某之妹也且語舅  
氏之恩且壯其節遺白金數兩而去遂登太行時隆冬  
雪盛天地晦冥官兵盜賊搶攘旁午從行者因長垣之  
役皆散去獨家君先妣二人而已而家君復目赤暴發



道滴水場太行之至險也盛雪冒之蹊徑不辨指峯巒  
為的攀緣嵌隙循躡崖磴負骸導家君而進纔半途已  
入夜矣黎明始出山再日達于陵川乃克襄事元光元  
年復渡河冬十有一月生經於許州臨潁之城皋鎮天  
興元年河南亡攜經北渡居于保繼舉彛庸二弟經年  
十有六欲以幹蠱自任先妣謂家君曰郝氏儒業四世  
矣名士如元遺山者我之自出故家淵源當益浚之可  
自我而涸乎今宗族之在河南者皆盡矣惟吾獨在有

三子焉豈非天也使是子也而有成不隊

堅同

家聲吾儕

凍餒無憾其或不成亦云命矣於吾責何有若以利責之子而不教是廢先世也先世之靈照之在上質之在傍將於誰而責也故家君感泣為之賦詩有日月儻隨天地在詩書終療子孫貧之句於是命經就學欲其先經也乃命之曰經經亦感奮以夜繼日或冠衣不釋如是者有年一日雞初鳴經猶凭几伏誦書帙紛紜殘燈無焰先妣竊視之慨嘆良久呼經語之曰能若是吾有

望矣勿始勤終怠喜而自足半途而廢吾見進銳退速者多矣力學而卒成者鮮也汝自暴棄一身小矣先世之責之重於汝大也經遂日益激勵蟠錯刮磨肆意經傳砥礪抉剔鉤昧蹈遠塊乎其若癡茫乎其若迷燭焉猶未光也而天遽降割歲乙巳冬十月十日邁疾丙午春三月九日考終命于私室春秋四十有九寓神宮于保之南原先妣資稟淳懿婉淑有守識慮詣極經所與游一見之輒曰某當交某當絕經或不如訓輒為小人

所累所居既去隣里思之稱道不容口待人以信不疑人欺已事家君敬慎不違每勸以義賓客至盡力供具資用闕必假貸以給經逮事十餘年雖屋漏獨處未嘗見其情容束諸子以義嘗語經曰吾忍窮使汝就學非為利也欲汝知道義負荷祖宗不汙之而已今世子弟以一時之利敗終身之義者皆是也是豈子弟之罪其父母不處以義而責以利使之然爾以貨財殺子孫吾不為也汝其勉之先妣雖終言猶在耳嗚呼旻天弗弔

經未底于成不副母氏之意母氏亦無一日之燕終身  
艱厄下壽而卒孰為之司而使之然也一女未笄二弟  
尚幼宛然失怙家君戴白坎然而憂何剝吾郝氏之虐  
也惟母氏之節之德固宜昭之金石著之竹帛不可昧  
沒也矧昊天罔極之報萬萬無一乎於是錄經之所聞  
所見者立言君子苟賜矜允為之譔述使遺美不墜光  
慰下泉雪終天之痛報罔極之德銘佩之意死且不朽  
謹狀

喬千戶行狀

高祖諱曾祖諱祖諱父諱順公諱惟忠字孝先涿州定興東王里人世業農為大家母李氏腹公七月而寡公幼聚嬉異於他兒及長有志畧捷勇善射衛紹王遇弒北鄙用兵四海有改卜之兆公慨然輟耕長嘆曰時事如此大丈夫樹立之秋也何區區爾為遂落魄不事生理俠遊燕趙間貞祐初宣宗南渡河朔大擾公以義軍從令萬戶張公起於定興保西山之東流碣樹義旗招

叛亡跨山連海威聲大振北兵扼吭盤桓而不得進行  
臺聞之便宜授公定遠大將軍恒州刺史受經畧苗道  
潤節制從張公鎮撫西山諸保砦張公勇而有謀膽決  
善戰燕趙之豪附之者衆每以方畧授公使戰輒中機  
會嘗以少擊衆由是威名冠張公之軍國朝悉兵南下  
萬戶張公逆戰于狼牙嶺馬跌被執時公居守東流碣  
北兵以張公至碣下招諭使降公拒之諸軍既登公猶  
拒守自若進攻拔之張公以腹心之舊爪牙之用能全

節守義義而釋之公荷更生之庇以死力自效遂從下  
雄易安保諸州宋人乘金之亂使彭義斌將兵襲河朔  
至澶魏建旆而北公以一軍蹂其鋒諸軍壯之真定武  
仙叛並山諸州縣保砦皆拒守萬戶張公會諸軍擊之  
令公攝帥將騎兵數百步兵三千人鼓行而西時敵兵  
將聚保於狼山砦公召諸軍吏曰彼將歸其巢穴我遏  
之必殊死戰歸師勿遏軍志之戒也不若覆諸山下啟  
其歸路彼既得歸莫有鬪志是獲獸于穴也衆從之適



兵既過公鼓譟奮擊大破之時有別部將陷敵者公橫  
戈突陣而入力戰救之乃獲免於是諸叛望風降附遂  
入鎮州武仙奔公會諸軍追之馘虜甚衆遂會攻彰德  
轉戰至齊魯駐軍滕州牙山中夜敵出不意襲壘而入  
公獨騎追戰奮戈大呼橫衝逆擊諸軍始覺譟以繼之  
敵衆駭散填山堙谷而奔於是公名震河朔矣其圍益  
都也援兵數萬幾及城公掩擊敗之獲衣糧戰具甚多  
遂閉其門會內兵闢門突出公嬰其鋒短兵接戰敵敗

走主帥旌公勇以勵諸軍先是萬戶張公開都元帥府  
于滿城以公為元帥都監遷副元帥至是帥還仍行二  
安州元帥事未幾出鎮唐縣行元帥事復從張公鎮新  
衛州辛卯冬渡河會戰于鈞州遂會諸軍圍汴金義宗  
北渡丞相白撒圍衛州力戰卻之追奔至黃龍崗復會  
諸軍圍蔡河南平張公入覲以公將行營征淮南歲甲  
午朝廷論功張公陸奏曰臣馮藉國家威靈所向克捷  
臣何力之有亦臣有一二爪牙熊虎之助臣之副將喬

惟忠戰功甚多乞加寵異於是朝廷以璽書金符錫公  
仍以千戶世其封自是連年大舉伐宋公感戴恩遇益  
自奮勵其破棗陽攻光黃等州功尤多丙午夏寢疾五  
月二十七日薨于第春秋五十有五寓殯于順天府城  
之東原公美鬚髯沈勇善戰遇大克捷恬無自得之色  
其攻黃州也敵兵夜襲諸柵公率銳卒戰主帥舉火視  
之見青甲而黃馬者戰甚力翌日主帥懸賞求之公竟  
不自陳其不矜如此雖奮起畎畝藹然有閭閻簪笏之

風事母孝每酣戰而歸必頓整冠服拜而問安及居喪過於毀瘠遂感疾不起治家有法束諸子以義節於自奉為子戶候而服食不過于華夫人毛氏子男五人孫三人女孫一人歲庚戌將改葬先塋文碑墓隧故次第始終昭灼者于右鴻儒碩筆其諒于茲孤子珪等狀

陵川集卷三十六